

दशलक्षण धर्म पूजन

पण्डित ध्यानतराय जी द्वारा रचित



स्वर

पंडित सुनीलजी शास्त्री एवं
सुश्री काव्या जैन, राजकोट

स्थापना

(अनुष्टुप)

उत्तमक्षान्तिकाद्यन्त-ब्रह्मचर्य-सुलक्षणम् ।
स्थापय दशधा धर्ममुत्तमं जिनभाषितम् ॥

(अडिल्ल)

उत्तम क्षमा मारदव आरजव भाव हैं, सत्य शौच संयम तप त्याग उपाव हैं ।
आकिंचन ब्रह्मचर्य धरम दश सार हैं, चहुँगति-दुखतैं काढ़ि मुकति करतार हैं ॥

ॐ ह्रीं श्री उत्तमक्षमादिदशलक्षणधर्म ! अत्र अवतर अवतर संवौषट् इति आह्वानम् ।

ॐ ह्रीं श्री उत्तमक्षमादिदशलक्षणधर्म ! अत्र तिष्ठ तिष्ठ ठःठः स्थापनम् ।

ॐ ह्रीं श्री उत्तमक्षमादिदशलक्षणधर्म ! अत्र मम सन्निहितो भव भव वषट् सन्निधिकरणम् ।
॥ परिपुष्पांजलिं क्षिपेत् ॥



अष्टक/जल

(सोरठा)

हेमाचल की धार, मुनि-चित सम शीतल सुरभि ।
भव-आताप निवार, दस-लच्छन पूजों सदा ॥



ॐ ह्रीं श्री उत्तमक्षमामार्दवार्जवशौचसत्यसंयमतपस्त्यागाकिंचन्यब्रह्मचर्येति
दशलक्षणधर्माय जन्म-जरा-मृत्युविनाशनाय जलं निर्वपामीति स्वाहा ।



चंदन

(सोरठा)

**चन्दन केशर गार, होय सुवास दशों दिशा ।
भव-आताप निवार, दस-लच्छन पूजों सदा ॥**



**ॐ ह्रीं श्री उत्तमक्षमादिदशलक्षणधर्माय संसारतापविनाशनाय
चन्दनं निर्वपामीति स्वाहा ।**



अक्षत

(सोरठा)

अमल अखण्डित सार, तन्दुल चन्द्र समान शुभ ।
भव-आताप निवार, दस-लच्छन पूजों सदा ॥



ॐ ह्रीं श्री उत्तमक्षमादिदशलक्षणधर्माय अक्षयपदप्राप्तये
अक्षतान् निर्वपामीति स्वाहा ।



पुष्प

(सोरठा)

**फूल अनेक प्रकार, महकें ऊरध-लोकलों ।
भव-आताप निवार, दस-लच्छन पूजों सदा ॥**



**ॐ ह्रीं श्री उत्तमक्षमादिदशलक्षणधर्माय कामबाणविनाशनाय
पुष्पं निर्वपामीति स्वाहा ।**



नैवेद्य

(सोरठा)

नेवज विविध निहार, उत्तम षट्-रस-संजुगत ।
भव-आताप निवार, दस-लच्छन पूजों सदा ॥



ॐ ह्रीं श्री उत्तमक्षमादिदशलक्षणधर्माय क्षुधारोगविनाशनाय
नैवेद्यं निर्वपामीति स्वाहा ।



दीप

(सोरठा)

ब्राति कपूर सुधार, दीपक-ज्योति सुहावनी ।
भव-आताप निवार, दस-लच्छन पूजों सदा ॥



ॐ ह्रीं श्री उत्तमक्षमादिदशलक्षणधर्माय मोहान्धकारविनाशनाय
दीपं निर्वपामीति स्वाहा ।



धूप

(सोरठा)

**अगर धूप विस्तार, फैले सर्व सुगन्धता ।
भव-आताप निवार, दस-लच्छन पूजों सदा ॥**



**ॐ ह्रीं श्री उत्तमक्षमादिदशलक्षणधर्माय अष्टकर्मदहनाय
धूपं निर्वपामीति स्वाहा ।**



फल

(सोरठा)

**फल की जाति अपार, घ्रान-नयन-मन-मोहने ।
भव-आताप निवार, दस-लच्छन पूजों सदा ॥**



**ॐ ह्रीं श्री उत्तमक्षमादिदशलक्षणधर्माय मोक्षफलप्राप्तये
फलं निर्वपामीति स्वाहा ।**




अर्घ्य

(सोरठा)

**आठों दरब सँवार, 'द्यानत' अधिक उछाहसों।
भव-आताप निवार, दस-लच्छन पूजों सदा ॥**



**ॐ ह्रीं श्री उत्तमक्षमादिदशलक्षणधर्माय अनर्घ्यपदप्राप्तये
अर्घ्यं निर्वपामीति स्वाहा ।**




उत्तम क्षमा धर्म

(सोरठा)

पीड़ें दुष्ट अनेक, बाँध मार बहुविधि करें।
धरिये छिमा विवेक, कोप न कीजै पीतमा ॥

उत्तम छिमा गहो रे भाई, इह-भव जस, पर भव सुखदाई।
गाली सुनि मन खेद न आनो, गुन को औगुन कहै अयानो ॥
कहि है अयानो वस्तु छीनै, बाँध मार बहुविधि करै।
घर तैं निकारै तन विदारै, वैर जो न तहाँ धरै ॥
ते करम पूरब किये खोटे, सहै क्यों नहिं जीयरा।
अति क्रोध-अगनि बुझाय प्रानी, साम्य-जल ले सीयरा ॥

ॐ ह्रीं श्री उत्तमक्षमाधर्माङ्गाय अर्घ्यं निर्वपामीति स्वाहा ।




उत्तम मार्दव धर्म

(सोरठा)

मान महाविषरूप, करहि नीच-गति जगत में ।
कोमल सुधा अनूप, सुख पावै प्राणी सदा ॥

उत्तम मार्दव गुन मन-माना, मान करन को कौन ठिकाना ।
बरस्यो निगोद माहिं तैं आया, दमरी रूँकन भाग बिकाया ॥
रूँकन बिकाया भाग वशतैं, देव इक-इन्द्री भया ।
उत्तम मुआ चाण्डाल हूवा, भूप कीड़ों में गया ॥
जीतव्य जोवन धन गुमान, कहा करै जल-बुदबुदा ।
करि विनय बहु-गुन बड़े जन की, ज्ञान का पावै उदा ॥

ॐ ह्रीं श्री उत्तममार्दवधर्माङ्गाय अर्घ्यं निर्वपामीति स्वाहा ।



सर्वोदय अहिंसा
— सर्वः सर्वत्र नन्दतु —


उत्तम आर्जव धर्म

(सोरठा)

कपट न कीजै कोय, चोरन के पुर ना बसै ।
सरल सुभावी होय, ताके घर बहु-सम्पदा ॥

उत्तम आर्जव रीति बखानी, रंचक दगा बहुत दुखदानी ।
मन में होय सो वचन उचरिये, वचन होय सो तन सौं करिये ॥
करिये सरल तिहुँ जोग अपने देख निरमल आरसी ।
मुख करै जैसा लखै तैसा, कपट-प्रीति अँगार-सी ॥
नहिं लहै लछमी अधिक छल करि, करम-बन्ध विशेषता ।
भय त्यागि दूध बिलाव पीवै, आपदा नहिं देखता ॥

ॐ ह्रीं श्री उत्तम-आर्जवधर्माङ्गाय अर्घ्यं निर्वपामीति स्वाहा ।



सर्वोदय अहिंसा
॥ सर्वः सर्वत्र नन्दतु ॥


उत्तम शौच धर्म

(सोरठा)

धरि हिरदै सन्तोष, करहु तपस्या देह सों ।
शौच सदा निर्दोष, धरम बड़ो संसार में ॥

उत्तम शौच सर्व जग जाना, लोभ पाप को बाप बखाना ।
आशा-पास महा दुखदानी, सुख पावै सन्तोषी प्रानी ॥
प्रानी सदा शुचि शील जप तप, ज्ञान ध्यान प्रभावतैं ।
नित गंग जमुन समुद्र न्हाये, अशुचि-दोष सुभावतैं ॥
ऊपर अमल मल भर्यो भीतर, कौन विधि घट शुचि कहै ।
बहु देह मैली सुगुन-थैली, शौच-गुन साधू लहै ॥

ॐ ह्रीं श्री उत्तमशौचधर्माङ्गाय अर्घ्यं निर्वपामीति स्वाहा ।




उत्तम सत्य धर्म

(सोरठा)

कठिन वचन मति बोल, पर-निन्दा अरु झूठ तज ।
साँच जवाहर खोल, सतवादी जग में सुखी ॥

उत्तम सत्य-बरत पालीजै, पर-विश्वासघात नहिं कीजै ।
साँचे-झूठे मानुष देखो, आपन पूत स्वपास न पेखो ॥
पेखो तिहायत पुरुष साँचे को दरब सब दीजिये ।
मुनिराज-श्रावक की प्रतिष्ठा, साँच गुण लख लीजिये ॥
ऊँचे सिंहासन बैठि वसु नृप, धरम का भूपति भया ।
वच झूठ सेती नरक पहुँचा, सुरग में नारद गया ॥

ॐ ह्रीं श्री उत्तमसत्यधर्माङ्गाय अर्घ्यं निर्वपामीति स्वाहा ।




उत्तम संयम धर्म

(सोरठा)

काय छहों प्रतिपाल, पंचेन्द्रिय मन वश करो ।
संजम-रतन सँभाल, विषय-चोर बहु फिरत हैं ॥

उत्तम संजम गहु मन मेरे, भव-भव के भाजैं अघ तेरे ।
सुरग-नरक-पशुगति में नाहीं, आलस-हरन करन सुख ठाँहीं ॥
ठांही पृथ्वी जल आग मारुत, रूख त्रस करुना धरो ।
सपरसन रसना घान नैना, कान मन सब वश करो ॥
जिस बिना नहिं जिनराज सीझे, तू रूल्यो जग-कीच में ।
इक घरी मत विसरो करो नित, आयु जम-मुख बीच में ॥

ॐ ह्रीं श्री उत्तमसंयमधर्माङ्गाय अर्घ्यं निर्वपामीति स्वाहा ।




उत्तम तप धर्म

(सोरठा)

तप चाहैं सुरराय, करम-शिखर को वज्र है।
द्वादशविधि सुखदाय, क्यों न करै निज सकतिसम ॥

उत्तम तप सब माहिं बखाना, करम-शैल को वज्र-समाना।
बरस्यो अनादि निगोद मँझारा, भू विकलत्रय पशु तन धारा ॥
धारा मनुष तन महादुर्लभ, सुकुल आयु निरोगता।
श्रीजैनवानी तत्त्वज्ञानी, भई विषय-पयोगता ॥
अति महा दुरलभ त्याग विषय-कषाय जो तप आदरैं।
नर-भव अनूपम कनक घर पर, मणिमयी कलसा धरैं ॥

ॐ ह्रीं श्री उत्तमतपोधर्माङ्गाय अर्घ्यं निर्वपामीति स्वाहा ।



सर्वोदय अहिंसा
॥ सर्वः सर्वत्र नन्दतु ॥


उत्तम त्याग धर्म

(सोरठा)

दान चार परकार, चार संघ को दीजिए ।
धन बिजुली उनहार, नर-भव लाहो लीजिए ॥

उत्तम त्याग कह्यो जग सारा, औषध शास्त्र अभय आहारा ।
निहचै राग-द्वेष निरवारै, ज्ञाता दोनों दान सँभारै ॥
दोनों सँभारै कूप-जल सम, दरब घर में परिनया ।
निज हाथ दीजे साथ लीजे, खाय खोया बह गया ॥
धनि साध शास्त्र अभय दिवैया, त्याग राग विरोध को ।
बिन दान श्रावक साधु दोनों, लहैं नाहीं बोध को ॥

ॐ ह्रीं श्री उत्तमत्यागधर्माङ्गाय अर्घ्यं निर्वपामीति स्वाहा ।




उत्तम आकिंचन्य धर्म

(सोरठा)

परिग्रह चौबिस भेद, त्याग करें मुनिराजजी ।
तिसना भाव उछेद, घटती जान घटाइए ॥

उत्तम आकिंचन गुण जानो, परिग्रह-चिन्ता दुख ही मानो ।
फाँस तनक-सी तन में सालै, चाह लँगोटी की दुख भालै ॥
भालै न समता सुख कभी नर, बिना मुनि-मुद्रा धरें ।
धनि नगन पर तन-नगन ठाड़े, सुर-असुर पायनि परें ॥
घर माहिं तिसना जो घटावे, रुचि नहीं संसार सौं ।
बहु धन बुरा हू भला कहिये, लीन पर-उपगार सौं ॥

ॐ ह्रीं श्री उत्तमआकिंचन्यधर्माङ्गाय अर्घ्यं निर्वपामीति स्वाहा ।




उत्तम ब्रह्मचर्य धर्म

(सोरठा)

शील-बाढ़ नौ राख, ब्रह्म-भाव अन्तर लखो ।
करि दोनों अभिलाख, करहु सफल नर-भव सदा ॥

उत्तम ब्रह्मचर्य मन आनौ, माता बहिन सुता पहचानौ ।
सहैं बान-वरषा बहु सूरे, टिकै न नैन-बान लखि कूरे ॥
कूरे तिया के अशुचि तन में, काम-रोगी रति करैं ।
बहु मृतक सड़हिं मसान माहीं, काग ज्यों चोंचैं भरैं ॥
संसार में विष-बेल नारी, तजि गये जोगीश्वरा ।
'द्यानत' धरम दश पैड़ि चढ़ि कै, शिव-महल में पग धरा ।


ॐ ह्रीं श्री उत्तमब्रह्मचर्यधर्माङ्गाय अर्घ्यं निर्वपामीति स्वाहा ।




समुच्चय जयमाला

दोहा

दश लच्छन वन्दौं सदा, मनवांछित फलदाय ।
कहों आरती भारती, हम पर होहु सहाय ॥




उत्तम छिमा जहाँ मन होई, अन्तर-बाहिर शत्रु न कोई ।
उत्तम मार्दव विनय प्रकासे, नाना भेद ज्ञान सब भासे ॥
उत्तम आर्जव कपट मिटावे, दुरगति त्यागि सुगति उपजावे ।
उत्तम शौच लोभ-परिहारी, सन्तोषी गुण-रतन भण्डारी ॥
उत्तम सत्य-वचन मुख बोले, सो प्राणी संसार न डोले ।
उत्तम संजम पाले ज्ञाता, नर-भव सफल करै, ले साता ॥



उत्तम तप निरवांछित पाले, सो नर करम-शत्रु को टाले ।
उत्तम त्याग करे जो कोई, भोगभूमि-सुर-शिवसुख होई ॥
उत्तम आकिंचन व्रत धारे, परम समाधि दशा विसतारे ।
उत्तम ब्रह्मचर्य मन लावे, नर-सुर सहित मुक्ति-फल पावे ॥

ॐ ह्रीं श्री उत्तमक्षमामार्दवार्जवशौचसत्य-
संयमतपस्त्यागाकिंचन्यब्रह्मचर्येति
दशलक्षणधर्माय जयमालापूरार्घ्यं निर्वपामीति स्वाहा ।



(दोहा)

करै करम की निरजरा, भव पींजरा विनाशि ।
अजर अमर पद को लहैं, 'द्यानत' सुख की राशि ॥

(पुष्पाञ्जलिं क्षिपेत्)